

# 1 Wangarini

## Wasina pakich kamanchinllpa yuwaa Wangarini minamtarini yandarangu anootsi

Yuwapur Wangarini kizpur wachinayaranllu, tputs zapan Isuschichpat shaniyarangitaatsin, yutarit tayaspatarangiya. Watam nutsini yutaritawa, ashiriya ¿tamareej Apanlli Wip tputseem kinaranga? tayaspataksin mangu tárangana. Mishat, nutsini yutaritcha; ashiriya ¿mayaama-ja wanasiri taachich? ngichkusin tárangana. Ashiriya Wangarini anoo mazarangaru, Tputsee tamapingachpasinaya, táyaru, Isuschicheem yandarangiya. Yandayaru, Nuw Isusoo parangtana; kukootstam mazarangtana; ashiriya nuwsha itsinsaru kamanchintspa yuwaa Isus tayaspatarangu anootsi, yandayaru tárangiya.

Ashiriya, na yuwaa kamanirangu anoo kamanchinllpa:

- A. 1.1-4: Isus uru waparpat taaranganaya. Itaru, nish tsapurunasush kusarangu, nuwsha parangtana; tsiyatarangtana; patatarangitama Isusootsi. Ashiriya siyaa, izuuru mangoonpana aturi, Isusoo kuk siyaam yandachintspa.
- B. 1.5—2.27: Apanllpat kis ipunamaam zandkus, mangiptis taangtsa. Yutarit taarintspa. Yutarit taakinaareesa, Isusoo mashangtsa yaramaama. Tputs, Isusoo chinaktana, atitaa, itaru tputsee natsaku, Isusootstam ndusha chinakiya. Tsapurunasee maachiri chinarintspa. Apanllputspanee kuk mazararintspa.
- C. 2.28—4.6: Isus musásiri kuschiya. Ashiriya wanasiriri taangtsa. Saanpatatis chinangtsa; Isusumun mangis tatungtsa. Mishat, tputs tayaspataku siya mangiptis mazarangtsa. Paptsa, tamapingeeyantsa.
- D. 4.7—5.12: Apanll kchinamishcha. Ashiriya tputs chinampanari taaku, Apanllchichcha. Tputs Apanllimun Wip mang' taktu, urutamari Apanllush taachiya.
- E. 5.13-20: Siy Apanllimun Wip mangis taktu, ashiriya urutamari Apanllush taatssa. Anoo siyaa kamanpi aturi yandarangina. Apanllpat tsiyatangtsa siyaa istamaama, tputseestam istamaama. Apanll uru siyaa istatariya.
- F. 5.21: Yusur wanichintspa; Apanllputsee chinarintspa.

Wangarini tárangiya.

## Wangarini wirkari minumtarini

¿Tamarimta, taaris Apanllchichis siya? Nuw Wangtana siyaam yandaki ani. Isusoo Apanlllee Wip kamanchintspa. Na mazarangantsa

**1** <sup>1</sup>Ndatuma tsapurunasee tinchu, urutari Apanlllee yámandampani Apanllpatari taataranaya. Itaru, uwsha tputseem kinarangu, Apanlllee iyaam izuuru yámandarangiya. Nuwaanasha kchipti parangi; nuwaana tsiyatku anoo mazararangi; nuwaana kuwipti patatarangina. Ashiriya siyaa kamanchintspa tina. <sup>2-4</sup>Ashirucha, Apanlllee yámandampanee siyaa kamankuri,

zureerutana atashina, watam kchiptarti paranginawa.

Uwsha taarashipancha. Apanllpat urutamari taaranga, itaru Apanll waanaatsi taarashipani zanganeeru, taarashipancha tputseem kinarangiya. Iyaam taarashemani urutamash panamaam kusarangiya. Ashiriya iyma tayaspatampani ichtaru mangooneeruni, waanaatsi taarash urutamash iyaam panarangu, iysha na urutamari taachiniya. Iy tamapariniya siy ashkachtamaareesa, siyapatam washunand taarashshee urutamash payuchinipa; mangis kishshaparee taatssa; mapiyshtich taamaama.

Ashirucha, Isusoo Apanlee Wip siyaa kamankina.

<sup>5</sup>Ashiriya, nuwsha Apanlee Wip kuk siyaa izuuru kamanchintspa. Apanll izuuru wanasircha; Apanll yutaritshishish nda pakchiyam chinakiya. Apanll 'sinpaz ashiru taakiya. Antaati Apanllish taap wanindareeja; nitaati yutaritshish min wanindareeja.

<sup>6</sup>Ashiri iysha Apanllchichini yutaritshishish wand taakinaareeniya, waanariya Apanllchichtanicha atuni, ngutani ngichkuni atiniya; taarashini waptataja. <sup>7</sup>Itaru, Apanll tamara ashiritamani taakchuni, Isus Apanll Wip ursirpat yutaritshishireetsich tachingtariya. Ashkachuni, waptacha taakaniya. Washunand Apanllchichpatatich kisshapa ipunachchi. Ashiri Apanll tamara ashiritamani taayani tina. <sup>8</sup>Itaru, chiy waanari nuw yutarit taatareezi, yutaritshishiri ndunparee átuch, an ngutani ngichkuni atini. <sup>9</sup>Itaru, Apanlee zurampatarta chinakurini, ashiritaa uru pantsamaam taariya. Ashkachuni, yutaritshishireetsich Apanlee kamankachuch, uwsha Apanll izuuru tachingkiya. Sheeru, mapiychstaya.<sup>a</sup> Watam Apanll mangedsis tachingchintspa, táranguwa. Apanll ttsinsampancha. Ashiri yutaritshishireetsini Apanlee kamaneeni atina. <sup>10</sup>Itaru, chiy waanari nuw sirútamastaati yutarit taarangeezi átuch, Apanlleetssha wayangichirireem ínakaniya, watam Apanll iyaa tsapurunasshucheetsini ichingurus yutarittischa atuwa. Atuni an antaati Apanlee kuk kaapa izuuru mangoonkeezini atini nduni.

**2** <sup>1</sup>Ashirucha, siyaa chinakuri, siyaam yandakuri, Yutarit taarintspa, atashina siyaatsiya. Yashing' chiyaa kasikchinaariya ashiru, chiyaam tapachindampani taarcha Isusu. Isus iyaam Waparpata tsiyatku k'kuzee yarkiya. Isusumari iyaa tapachindamaam wari-tariya, watam wamari izuuru wanasiri taakuwa. <sup>2</sup>Waana Isus iyaam yutarit-

shishirini tsiparangu, mangeetsini tachingeeru, Waparee yámandakchu, Waparsha iyaa kis napkiya. Itaru, nda iyamamta yutaritshishirini tsiparangu, ichingurooma tsapurunas tputs taakana anoom tsiparangiya. Ashirucha, Apanll tamara ashiritamani taayani, atashina.

<sup>3</sup>Ashiriya, iysha, Isusoo mangoonaktana atuni, Apanlleetstam kamachtamarini izuuru payukuni, zuruku atiniya.

<sup>4</sup>Itaru, tputs Apanlee kamachtamarini kapeetku, Apanlee mangoonaktana, atitaa, wayangichirircha anu. Nitaati ttsin-sakeeja. <sup>5</sup>Itaru, yuw tputs Apanlee kuk payuku ancha izuuru Apanlee chinaku ashkiya. Isus tamapari ashishtini anumun yaanaatsi natstakshtiniya. <sup>6</sup>Yuw tputs Isuspataricha taarataraw ashki átu, an Isus sirú tamarupa taarangiya ashiritam taachpa.

<sup>7</sup>Yuw chinaki anis, mazinangtsa; nuw siyaa táchintspa; Saanpata Apanllchichpatatis chinangtsa; natsarintspa. Anoo siyaa kamachtapi aturi yandakina. Sirú anoo mazarangitaatis, ashiritaa yusur mangeetsis p'tsichintspa. ¿Antaati an kaneescheeja? Yuwapur Isus sirútari nish taarangu anpur yaanpata chinamaam kamachtarangiya. <sup>8</sup>Ashiritaa, anuri kaneescheetspaz ashiru kis waneekina, watam na payuksawa. Isusumun kchínámshimun mangis tatku, saanpata chinnaktamsa. Anumunsha yutaritshishiris na tsípakachshacha; wanasiriri taamaam chinaksa. <sup>9</sup>Itaru, tputs Isusoo izuuru mangoonaktana atitaa, itaru Apanllchichpata natsaku, mangu ngichku atiya, watam natsashish Apanleem yutaritawa. <sup>10</sup>Itaru, Apanllchichpata chinaku, ashiri zurku atiya; ngichiz nduncha. Apanllchichpatatich chinakuch, ¿mayamunaja xarachich? <sup>11</sup>Itaru, natsakchinaarich ashiru, tunimashpaz ashiru taakchi; masat masat tunimush ashikpaz ashkiya; Yashingup naachu anoo nda yasariya. Ashirucha, nda ashimaam, saanpata chinangtsa siyaa atashina, zuwanllée.

<sup>a</sup> 1.9 Salmo 32.5 tsiyatsis nipta tatsamooru taaritamta.

**Siyaam Apanllchicheemis ichinguru  
yandakuri, yutaritshishee  
chinarusinapa aturi waneekina**

<sup>12</sup>Kanungaseemis yandakina, watam Isusumand wamin yutaritshishireetsis Apanll tachingaranguwa. <sup>13</sup>Wachinamtantis yandakina, watam Isusoo yuwaa urutari taarangu anoo mangoonaksawa. Siyaamtam tputsis ichinguroomis yandakina, watam Yashingoo yutaritamapane kasiyantsawa. Ashiri na siyaa waneekchuri, nuwaa kuki mazinangtsa, watam siy kanungasis Apareetsich mangoonaksawa. <sup>14</sup>Mishat, siy wachinawis nuwaa kuki mazinangtamtsa, watam Isusoo yuwaa urutari taarangu anoo mangoonaksawa. Mishat, siy tputsis ichingurus mazinangtamtsa, watam siy Apanllee kuk payurangus anumun kizpurtayantsawa; mishat Yashingoo yutaritamapane kasiyantsawa.

<sup>15</sup>Ashiri nuw siyaa Apanllchicheetsis táchintspa; Tsapurunasee wazan chinariintspa. Mishat, tsapurunaseetstam maachiri chinariintspa. Yuw tputs tsapurunasee maachiri chinaku an Apareetsich chinakeeja. <sup>16</sup>Yuw ichinguru tsapurunasish taaku an kaapana Apareezich maachirita. Tsapurunascha maachirita. Yutaritshishingaz támarakich, nazandkich, chaanaatstamari taarasheetsich ungirtakich an nitaati Apanllchicheeja. Annaa ichinguru tsapurunaschichcha. <sup>17</sup>Naturaricha tsapurunas taaksha. Mishat, naturaricha tsapurunas maachiri támarashish taaksha. Tsípachshaparee, watam an nda Apanllchichinawa. Itaru, tputs yuwaatsimari Apanll zandku anootsimari tuminkachu, an urutamari taaratartachiya. Ashiruch tsapurunasingaz wazan chinariintspa táshina.

**Zuwanllee, mazinangantsa,  
misha kizatamtis. Isus undarari,  
apanllputspan pzapaneeyanlliya**

<sup>18</sup>Sirú nuw siyaa kamaniranguri, Sitarunas zapshtakchu, apanllputspan pzapaneechusin, anamunsha Isus

undarar minam kizpur naanllpa, siyaa, tárangina. Yuwari, tárangi anu na pzapaneekachpa; urkarimsha na pishtakiya. Ashirucha, Isusoom kusamaam tuwayamayannlltamcha atina. <sup>19</sup>Natumasamaam an apanllputspan iyash tachitamana tachitarangana. Itaru, zapish ngatarangsin, iyaa kasatartarangusin, apanllputspaneemsha kinatartayanllinaya. Itaru, kaapana Apanllchichimunaja, ndambaree. Apanllchichinaariya ashiru, iyash izuurinaaparee tachitaranginaapsinaya. Yuwamuncha iyaa kasatartarangana anumun natstakini. Ashiruch Apanllchicheeja tini. <sup>20</sup>Itaru, siyaa Apanllchichis ashcheezis ndambaree, watam Isus Waana Wani siyash pshtaranguwa. Ashiriya, siyamanaa anuripa tamang'tachintsa itsinsaru mangoonamaam Apanlleetsi. <sup>21</sup>Nitaatiya Apanllee kuk ndunind mangoonkana siyaa ateezi yandaki. Watam mangoonaksawa. Wapta Apanllee kuk yasaris. Ngichzipan xiykchinllina an siyash kuskatssin, siy anush nda tachitamaam aturi siyaam yandakina. Ndamba siy yasaktamsa; antaati ngichzish tsiyatsis zuramamish nda wanindtareeja, watam wayangichirir anpaniritam taakanawa. <sup>22-23</sup>Apanllputspan zapan mangutanda sarichkusin tayapstakana. Apanllinaari taarita, itaru Isus kaapana Apanlleeya Wipa, ngichkusin atanaya. Tána an waantartisin Apanllee ngichkanaya, watam Wapareetstam misha Wipaastam tsimbunuri ngatkanawa. ¿Antaati Wipaa ngatkusin, Apanllchich ashtareeja?

Itaru, tputs Isus Apanllcha Wipa, zurampatari átu, uwsha kaapa Apanllee mangoonkiya; Apanllchicheem kinakiya. <sup>24</sup>Sirútarí siy anoo mazinangsa yuwaa Isus Apanllcha Wipa, atini anootsi. An k'kuz watacha Isusumuncha kamungamaam waritaku, tárangini anuya. Ashiriya, anuri mangoonangtsa; nllitari chinariintspa. Anuri mangoonkinaareesa ashiru, Apanlleetsimari chinaku, Aparpatich taarataraw ashtatssa; Wipapatam taarataraw ashtatssa,

<sup>25</sup> watam waana taarashish urutamash siyaam panachintspa, táranguwa.

<sup>26</sup> Ashiriya, apanllputspan siyaa uru tamapingayani atusin tayapstakana.

<sup>27</sup> Ashiriya, mazinangtsa; Isus Waanaa-tsi Wani siyash pshtayaru na itsinsaru mangoonaksa. ¿Ashiri mayaamshta tputs piyartach siyaa tayapstach? Waana Apanll Wani siyaa ichinguru izuuru ksutkiya. Zuramamsheetsimari tamang'tachiya. Ngichima yasareeja. Yuwari tamang'taku anuri chinangtsa. Ashirucha, nuw siyaa: apanllputspanee kuk payurintspa táshina.

**Ashiriya, Isuschichis, yuw nuw chinaki anis, mazinangtsa**

<sup>28</sup> Siy Apanllchichis Isusoo mangoon-kus, Isuspat minamaripaz ashirus taangtsa. Ashkachus, Isus kuskachu, mapiytssa; nda pazikus punirustatssa. <sup>29</sup> Isus ttsinsampanimanda. Ashiriya, yuw tputs itsinsaru taaku an Apanllimun nllurtarangu ashkiya. Anuri mangoonangtsa siya Apanllchichis.

**3** <sup>1</sup> Tamaru iyaa Aparich chinaka, watam iyaa ipartana atuwa! Apanlltanicha wipini, watatanicha. Tsapurunasshuch tputs Apanllee natstakazinllinaja. Ashirucha, iyaatstam nduntam natstakshinllinaya. <sup>2</sup> Isuschichis, mazinangtsa; na in Apanllshatanicha wipini. Itaru, yuwaa izuuru kinartartachini anoo wasina nda yasakini. Isus kuskachu, ashiriya Isus waana tamapari ashtachtamaniya, watam izuuru Isusootsiri kchiptini pangchiniwa. <sup>3</sup> Iy Isusoo kchipti pangchina zurkinaari atuni, ashiri Isus tsas ashiritam Apanllchichini taachiniya.

<sup>4</sup> Itaru, tputs Apanllee kamachtamarini mapiyku kapeetachshaparee. Yutaritshishpaneem kinachiya, watam Apanllee kamachtamarini kapeetkuch, uru yutaritshishee payutarchiwa. <sup>5</sup> Itaru, Isus yutaritshishee tachingamaam kusarangiya. Isus waana yutaritshishirini ndunimanda. <sup>6</sup> Ashiriya, yuw tputs Isuspatari minamaripaz ashiru taaku an yutarit taatareeja. Itaru, yuw tputs

yutarit taaku an Isusoo mangoonkeeja. Ashiri wanasiriri taangtsa tina.

<sup>7</sup> Mazinangtsa; yuw tputs itsinsaru wanasir taaku, wtsinascha, Isus waana tamaparee ashiritamcha. Itaru, zuwanllee, papcha, yuw nda ashimaam yasarana anin tamapingayantspa. <sup>8</sup> Itaru, yuw tputs yutarit taamamari taaku Yashing'chichcha, watam Yashing' urutari yutaritshishpaniri taakuwa. Itaru, Apanll Wip Isus Yashingoo kapeetamaam kusarangiya. <sup>9</sup> Ashiriya, Apanllchich tputs yutarit taamamari taakeeja. Yutarit taamamari pinasakiya, watam Apanllimun nllurtamawa; misha Apanll tamapari ashiru yutaritshishee ngatkuwa. <sup>10</sup> Anumand Apanllchichee kamirana natstachchi; misha, yashing'chichee kamiranatam natstachchi. Tputs nda itsinsaru wanasir taaku an Apanllchicheeja. Yuw nda zoonlleetstam chinaku an Apanllchichtamtaja; Yashing'chichcha anu.

<sup>11</sup> Ashiri saanpata chinangtsa tina, watam sirútari anoo mazinarangtsawa. Isus ichtaru yaanpata chinamaam kamachtarangiya. <sup>12</sup> Zitaminarinee Kayínarini tamarangparee shirintspa. Uwsha zoonllee natsayaru, pacharangiya. Kayín yutaritamapanichcheeru, zoonllee pacharangiya. Waana yutaritamashee chinaku, uwsha zoonllsha Apanlleetsimari kuk tuminku anumand zoonllee pacharangiya. Yashing'chicheeru ashirangiya. Ashiruch siyaa Kayíntiyaspa; saanpata chinangtsa táshina.

<sup>13</sup> Zuwanllee mazinangtsa; tsapurunasshuch tputs Isusumand siyaa natsakchu, siysa mangis mantsarintspa. <sup>14</sup> Sirú iy yashing'chichimunni taarunguni, Apanll waana Yashingoo itutseeru, taarashish urutamashi panayaru, iyaatssha Apanllchicheem ínarangiya. Anoo yasariniya, watam zuwanlleewaatsini chinakaniwa. Itaru, yuw nda chinamaa yasaru ancha wand tsipatsshuri taatarinya. Yashing'chicheeru ashtariya. <sup>15</sup> Yuw zoonllee natsaku wápachcha. Ndamba yasariniya; wapchash taarashish urutamash wanindareeja.

<sup>16</sup>Itaru, Isus iyaa chinamaam yap-starangiya. Isus waanaatsi tsipun nda pachindarangu iyaam tsiparangiya. Ashirangu anumun chinamaa mangoon-kini. Ashirucha, Isussha iyaa: Nuw tamarangparina ashikpaz shingtsa; kiyung kachiykitaateesa, tsipakitaateesa, tputs wamin shingtsa tiya. Nuwachichpatartis zuwanlleemawis yuw nuwaanchichitis anis saanpatatam saanaatsi tsipaneetsis pchindintspa, tárangiya. <sup>17</sup>Ashiri tputs Apanlee mangoonaktana atitaa, itaru nda waanpata pishtakana anoo istaku, an tputs Apanlee chinatareeja; mangu atiya. Waama nduntaa pishtaku, tputs-tisin maachiri pishtaku, nda anoo nayaniku, wchumari napku, anush Apanll chínash taatareeja. <sup>18</sup>Ashirucha, Isuschichini zuwanlee, k'kiptini chinakini watsishaparee. Izuureershtini mangiptini chinamarisha chinayani Apanllchichpatatani; siyaa táshina.

**Mishat, táchintspa; Apanlee nda punimaam kamanchintspa**

<sup>19</sup>Yaanpatatini izuureeshtini chinakchuni, yaanaats mangini izuurashtini natstachshitiniya. Iy Isusumun mangini tatkachuni, mapiyshitini taachini. <sup>20</sup>Itaru, mangishini xaraktaatani ashiru, Apanllimun mangini tatkuni, mapiychshitiniya, watam Apanll mangeetsini kasiruwá. Apanll waana mangeetsini yasaruwá. <sup>21</sup>Ashiri zuwanlee, anumun ndunnaa mangini xarakuni, Apanllpat ipunamaam punirustacheezini, ndamabaree. <sup>22</sup>Apanllpat tsiyatkuni, yuwaamsha pishtaku anoomsha istachiya, watam Apanlee nuwaa kis napanda atuni, kamachtamarini payukiniwa. <sup>23</sup>Apanll iyaa kamachtarangu; Iparimuni Ísúkirísumun mangis tatungtsa, misha saanpatatis chinangtsa; kamachtaku, tárangiya iyaatsi. <sup>24</sup>Ashiri yuwini ichinguru Apanlee kamachtamarini payukini anni Apanllchich uru taachini. Apanlee uru chinachini; uwsha Apanll uru iyaa chi-

nachtamta. Apanll iyash taakcha atiniya watam Apanll Waanaatsi Wani iyash pshtarangiya mangeetsini p'tsimaama. <sup>a</sup>Anumun yasakini yuwaa Apanll iyaa chinaku anootsi. Ashiruch kamachtamarinee payukuch, ¿mayamunaja xarakuch punichich? táshina.

**Zuwanlee, mazinangtsa; misha Isuschichpatatini wanichintspa. Ngutis nllitaritawaa kuk tumintspa**

**4** <sup>1</sup>Tputs shiyash kuseeru tsiyatku, mazinangimasints. Kamapari itsinsaru Apanlee kamanku, ysangimasints. Apanllimun Wani áti atitaateesinaya, ashiritaa anoo yachangimasints; ayu anuri tárintspa. ¿Kaapa Apanllchichinaareeja, watam Apanlee kuk kamani-maptsi zapan taaruwa? Tsapurunasish ichinguru xiykana. <sup>2</sup>Ashiri yachangintsá. Tputsha: Isus Apanll Wip tputseem kinarangiya atinaariya ashiru, Apanllimun Wani zurku atiya. An tputs Apanllchichcha, átu anumunpa natstassa. <sup>3</sup>Itaru, yachakus, tputssha: Nitaati Apanll Wip tputseem kinarangeeja atinaariya ashiru, Apanllimun Wani nda atiya; Yashingumuncha atiya. Isuscha undarari yuwaa sirú naanchinpa siyaa, tárangi ancha. Natunaa kamanimaputs tsapurunasish pzapaneekatcha.

<sup>4</sup>Itaru, siyaya zuwanlee, na Apanllchichtischa. Apanll Wani siyash mangis taakiya. Wamarisha kasiriya. Yashing'chichee kasikiya. Ambi ashkachus mangeetsis p'tseeyaru, siyamari kasitssa tsapurunasshucheetsi.

<sup>5</sup>Itaru, uwaya Apanlee kuk kamani-maptsi tsapurunasichischa. Ashirucha, tsapurunaseetsimari tsiyatkana. Waanpatatin tsapurunasshuchpatatin uwaatssin kuk kis mazinakanaya. <sup>6</sup>Itaru, iyshacha Apanllchichtanicha; Apanlee kuk zurkuni tsiyatkiniya. Ashiri yuw Apanlee mangoonkana an iyaa k'kini kis mazinaksincha. Itaru, yuw nda Apanlee mangoonkana an iyaa k'kini

<sup>a</sup> 3.24 Esekíyela 36.27 tsiyatsis nipta tatsamooru taaritamta.

ksaja mazinakana. Anumuncha k'kuzee zurumamshi natstakini; misha, k'kuzee mamarpamashi natstakitamani. Ashiruch tputs siyaa Apanlee kuk tayapstachintspa tinaariya ashiru, natstangama-sints atina; ¿kaapaneeja Apanllchich? tángtsa; tina siyaatsi.

**Zuwanlee, mazinangtsa;  
nuw siyaa táchintspa**

<sup>7</sup>Yaanpata chinayinshtini tina, watam Apanll kchinamshiwa. Yuw tputsee chinataru an Apanllchichcha; Apanllimun nllurtamcha; Apanlee mangoonakcha. <sup>8</sup>Itaru, yuw tputsee nda chinaku an Apanlee mangooneeja, watam Apanll kchinamshiwa. <sup>9</sup>Apanll Wipaa minumtaastaa tsapurunasish zanganirangu. Iyaam Wipamun taarashish urutamashi payumaama zanganirangiya. Anumuncha iysha Apanlee chínash natstakini. <sup>10</sup>Nitaati iy Apanlee chinangeezini. Itaru, uwshacha iyaa chinarangu,<sup>a</sup> Wipaa zanganirangu, iyaam yutaritshishirini waana mapiyamaa Apanll zanganirangiya. Anumuncha Apanlee chínash yasakani;<sup>b</sup> yuwaa iyaa chinaku anootsi. <sup>11</sup>Ashiri zuwanlee, Apanll amb ashku iyaa ksumish chinarangu, iysha yaanpata chinachtamanipa. <sup>12</sup>Nduntaa iy tputsini Apanlee pataruni, ashiritaa Apanll iyash mangini taarcha. Iy yaanpata chinaknaareeni ashiru, Apanll iyash taakiya. Ashkachuni, Apanll chínash iyash tatsamoomcha. <sup>13</sup>Apanll iyash mangini taariya. Iysha Apanlee chinakani; uwsha Apanll iyaa chinaktamcha. Nee mangoonkini yuwamun iyash Waanaatsi Wani pshtarangu anumuna. <sup>14</sup>Mishat, iy wipunashini Isusoo kchipti paranguni, nuw zulkuri kamankina. Apanll Waanaatsi Wip zanganirangu tsapurunasshuchee Yashingoo tatutsimaama. <sup>15</sup>Ashiriya, tputssha, Isusu Apanllcha Wipaya, átu an Apanll uwash taakcha; uwsha Apanllpapaz taaku ashishta. <sup>16</sup>Ashiriya, anumuncha

Apanlee chínash yasakaniya, anamuntam mangini tatkiniya. Apanllimari kchinamishcha atiniya. Ashiriya, yuw chinampaniri taaku an Apanlee china-kiya; uwsha Apanll uwaa chinaktamta. <sup>17</sup>Ashkachuni, yaanpatatini chinakuni, Apanlee kaapanasha chinakini. Ashiri iwash zari waana Apanll tputsee waneekchu anush iysha ndusha punichiniya; mapiychiniya. ¿Watam Isus tamapari ashiritam chinampatari taakaniwa tsapurunasshu? <sup>18</sup>Tputsee chinakuch, ¿yapee yáyarú chiyaa wánich? Izuuru chinashchee chinakuch, Apanlee punimaam nduncha. Itaru, punikuni Apanlee izuuru nda chinakaniya, watam wandari waneeshshee punikaniwa. <sup>19</sup>Iy izuuru chinakini, watam uwma Apanll iyaa chinaranguwa. <sup>20</sup>Ashiri tputs Apanlee chinaktana átu, itaru tputsee natsaku, an wayangichirircha ashtarasha. Tputsee paktaa nda chinaku, ¿Apanlleetsinashtaja ndunnaasha paku anoo chinach? <sup>21</sup>Itaru, Apanll waana iyaa kamachtarangu; Yuw nuwaa chinaku, ashiri tputsee chinachtampa; átscha. Ashiri Apanll iyaa ksumish chinaku, iysha yaanpata chinachtamanipa. Anuri chinangtsa, zuwanlee.

**Mishat, zuwanlee, yutaritshishee  
kasimaam Isuschichpatatini  
kamanchintspa**

**5** <sup>1</sup>Yuwini Isusoo izuuru mangoonkini anni yutaritshishee izuuru kasitarchi. Yuw tputs Ísukirístoo zuramaritcha Apanll Wipa, átu an itsinsaru Isusoo mangoonku atiya; Apanllimuncha nllurtaru ashkasha. Mishat, uru tputseewa waparee chinakuch, wipaastam chinachtampachee. Misisinasha ashchitampariniya Apanllchichpatatani. Apanlee chinakinaareeniya ashiru, ¿tamari wipaa-tseewa Apanllchicheewa nda chinachini? <sup>2</sup>Ndamba yasariniya; Apanlee chinakuni, Apanlee kamachtamarini payukuni, ashiri Apanllchicheewa chinachtamani-

<sup>a</sup> 4.10 Tayusima 7.7 tsiyatsis nipta tatsamooru taaritamta. <sup>b</sup> 4.10 Tayusima 6.5 tsiyatsis nipta tatsamooru taaritamta.

ya. <sup>3</sup>Kaapa Apanlee chinakinaareeniya ashiru, yuwaa Apanll kamachtarangu anoo kis payuchini. Apanll kamachtamarini mbamaja. <sup>4</sup>Yuw tputs Apanllimun nllurtama an yutaritshishee kasikastanlliya. Apanllimun mangini tatikuni, ashirucha yutaritshishee kasikini. Yungparipa ashirangiya anumun ashkini atiniya.

<sup>5</sup>Ndunnaa Isusoo itsinsaruni mangoonkuni, yutaritshishee kasimaam pinasakaniya. Yuwamari Isusoo Apanllcha Wipa, átu anumari yutaritshishee kasikiya.

<sup>6</sup>Isus Apanllcha Wipa, atini. Apanll waana Isusoo zanganirangu, Isussha kuseeru, kungush ichumayarusin anush Waparsha tsiyatarangiya. Mishat, Isus yasinamun tsiparangu, ursirsha iyaa yutaritshishirini tachingamaam parungarangiya. Ashiri anumun tsimbun washunand, kungumuna misha ursirimun Isusoo izuuru natstakaniya; yuwaa Apanll waana zanganirangu anootsi. Mishat, Apanll Wani kamanku, tamang'taksha, watam Apanll Wani zurumapaniwa. <sup>7</sup>Ashiri tuchpamuncha mangoonamaam waritaksha.

<sup>8</sup>Apanllimun Wani, misha kungumuna, misha ursirimuna, ashpamuncha mangoonamaam waritaksha; yuwaa Ísúkiristu Apanllcha Wipa, atini anootsi. <sup>9</sup>Yuwaa tputs kamanku anoo payukinaareechi ashiru, misisina Apanlee kamanimarini payuchchi, watam kasiruwa. ¿Watam waana Apanll, Isus nuwcha Ipari, táranguwa? <sup>10</sup>Ashiri yuw Apanllimun Wip mang' tatku an Apanlee kamanimarini payukiya. Apanlee kaapa mangoonakcha. Itaru, yuw nda Apanlee zurakcha átu an Apanlee wayangichhireempaz ashiru ínakiya, watam nda Apanlee kamanimarini payukuwa. ¿Watam yuwaa Apanll Wipaa átu anoo nda mangoonkuwa?

<sup>11</sup>Itaru, Apanll zurku atiya. Taarashish urutamash Apanll iyaam panarangiya. Wipamunarisha taarashish iyaam panarariya, watam waana atuwa. <sup>12</sup>Ashiri tputs Apanlee Wip mangoonku, taarashishee urutamash payukcha. Itaru, tputs nda Apanlee Wip mangoonku, taarashishee nduntam payukiya. <sup>13</sup>Yuwamis iy

Apanllimun Wip mangis tatkis anoomis kamankina. Taarashishee urutamashi izuuru payukina tápana aturi, siyaam yandakina. Ashiruch Isusootsim Apanlee Wip chinangtsa siyaa táshina.

### Zuwanllée, mazinangtsa

<sup>14</sup>Apanllimun Wip waanari izuuru mangini tatikuni, Apanllpat tsiyatkuni, Apanllsha iyaa kis mazinakiya. ¿Ashkuni mayamun xarachich? Apanllpat tsiyatkachuni, yuwaa Apanll waana zandku anootsiya mashkachuni, Apanllsha ayu atiya. <sup>15</sup>Ndamba yasariniya; yuw ichinguru mashkini anoo iyaa mazinakiya. Waana Apanll mazinaku, yuwaa mashkini anoo istachiya. <sup>16</sup>Mishat, Apanllpat tsiyatkus, tputseem mashangtsa. Apanllchich tputs yutarit taaku pakush, yuwam yutaritshishee nda tsipatspatari taaku anoom Apanllpat tsiyatangtsa. Apanllpat tsiyatkuch, shiyamun tsiyatssirish Apanll uwaamsha taarashish panachiya. Itaru, tputs yutarit taaku, yuw tsipatspatari yutaritshishee taaku anoom Apanllpat tsiyatangtsa teezi, nduni; wani yutaritarinpatari tsipachiya, atina. <sup>17</sup>Ichinguru yutaritamash yutaritshishcha. Itaru, ashpatam nda tsipatarich, itaru ashpatam tsipatsimash taariya.

<sup>18</sup>Ndamba yasariniya: ¿Yuwich Apanllimun nllurtamich anich tamaree yutarit taamamari taachich? ¿Watam Isus Apanll Wip chiyaa patsisakuwa? Isusumun chiyaa Yashing' yutaritamapan xapookcha. <sup>19</sup>Iy Apanllchichtanicha. Ndamba yasaraniya. Tsapurunasshuchee ichingurusin Yashing'cha maachirita. <sup>20</sup>Ndamba Apanll Wip kusarangu anoo yasariniya. Ancha iyaam mangoozee panarangasha waanaatsi natstamaama, watam uw zurku Apanlliwa. Iy Wipapat Ísúkiristupat zuramapanipat taakiniya.

Uw zurumaritcha Apanllirita; taarashish urutamashirita. <sup>21</sup>Chinaki anis, nuwaa kuki mazinangantsa. Isusootsimari chinangtsa; apanllputsee pakchiam chinarintspa, tina.

[Wapparee.]